
FASNACHT 2017



PIERROT-CLIQUE BASEL

Sujet :

PanAmArsch

oder

S laufft au myys in unserem Paradyys

Äänen am Bäärg isch es scheener und besser
s Graas isch griener, dr Kebab isch greesser.
Daas dänggen au dr Tiiger und dr Bäär:
Naimen anderscht isch s Lääbe weeniger schwäär.

Si mache sich uff, mit Hoffnig und Muet,
in *Panama* sigs sauglatt statt nur guet.
Aber woo, verdegge, isch das "*Panama*"?
Glyy fyyle si sich s eerschtmool, verdoori, am A...
Der eerscht sait linggs, die näggschdi rächts.
Si hänn e Brobleem, und zwar en ächts.

Si erlääbe au Scheens und dolli Sache,
bis si meergge: "Nai, soone Schaiss,
mer laufe die ganzi Zyt im Grais!"
Si nämmes logger und mien lut lache:
"Am scheenschten isches doch dehai.
Miir wänn nimme wägg, ganz sicher nit, nai!"

Dasch e Gschichtli, leerrych und nätt.
Wenns nur nit so druurigi Parallele hätt
zur haarte Realidäät in dääre Wält.
Am Schluss regiert eebe doch nur s Gäld.

Näabem Janosch loosi gäärn
Lieder vomene Maa uss Bärn.
In beschte Väärs, so dass muesch lache,
verzellt äär vyyli woori Sache.
Ai Lied basst aaber ganz brezyys
zem Sujet iiber s Paradyys:

"Dr Sidi Abdel Assar vo El Hamma
het am Moorge frie, no im Pyjama,
in dr Strooss voor der Moschee
E gfitzte Banggberooter gsee...
Und jetz inveschdiert äär in *Panàma*."

Dr Mani Matter säilig
isch e groosse Visionäär

gsi, äär het die Empfäalig
fir e jeede Millionäär
vooruss gsee. Jä, es isch no schlimmer:
Au d Britisch Virgins, Zug, und... wo au immer,
sinn digg im Gschäft mit verstegge Milliarde,
der Fiskus duet vergääbens uff si Gäld waarte.
Länder mien spaare, geen fascht banggrott,
in s Fyschtli lacht sich jeede ryychen Idiot.

Bresidänte, Oligarche, Fuessballstaare...
Alli wänn Millione spaare,
bhaltes fir sich statt dr Gsellschaft z diene,
sinn aber drotzdäm nit gliggig und hänn niene
e richtig Dehai und e bitzli Rue.
Gäld verstegge git halt z due.

Dehai ischs am scheenschte zwoor, fascht s Paradyys.
Drotzdäm goots uns zimlig myys.
S Gäld fir Schuele, Stroosse, schwiirigi Goofe
fäält iiberall, es isch e Kataschtroofe.
Me versteggs lieber voor em Staat,
spaart e bitz Styyre, und mir hänn der Salaat.

Es verdiene nur no Bangge und Milliardääre.
Verzwyfflet suechen alli Tiiger und Bääre
s wiirggig ächte Paradyys.
Aber e Hufte spiile richtig fyys.

E baar hänn schnälli Leesige, ganz aifachi...
wänn Gränze schliesse, nai do lach y,
wänn dr Ali uusegheie und verspräche s ney Ryych.
Derbyy sinn si egoistisch und dängge nur an sich,
hänn sälber iir Gäld in Zug und *Panama*.
Es ryyt sich so scheen, drum laggged uns am A...

S stimmt vyyli nimm ganz uf däären Äärde,
s wänn alli als wie ryycher wäärd.
Solidaridäät wird allewyyli mee
e Fremdwort und - und daas duet wee -
sogaar e Schimpfwort isch es scho.
Nätt und guet isch schlächt dernoo!

Miir mien jetz aafoo sälber dängge,
sunscht wirts bi uns doo langsam gritisch,
s duet sich nimm sälber mee yyrängge.
Merggsch, Bebbi, dass es langsam Zyt isch?

In Amerika wääle si e Drambbel, gopf!
In Dytschland imitiere si en alte Zopf.
Nid besser isches in dr Schwyz,
merggschs an dr Baz, e soone Witz.

Statt wie friener *Panama*
muesch im Visier der Maars jetz haa.
D Wält isch verloore, gheersch vyyli flueche,
mer mien s Paradyys jetz deert oobe go sueche.

Aber halt, mer hänn bi uns doch jeedes Joor
drey Dääg s Paradyys in Aug und Oor!
Uff dr Gass isch unser paradyysisch Ryych.
Mit ere Laarve sinn eeben alli glyych.

Me goot an d Ladäärnenuusstellig uff e Minschterblatz.
Si isch offe vom Määntigzoobe bis am Mittwuchdemoorge.
Uns und unseri Jungi Garde findsch im Internet under
www.pierrotclique.ch